


RAPORTI I MONITORIMIT PER AKTIVITETIN E INSTITUCIONIT PER VITIN 2017

Autoriteti i Konkurrencës në zbatim të ligjit nr. 9121/2003, konsideron shumë të rëndësishëm mirëfunksionimin e tregjeve duke përfshirë në të aktorë dhe faktorë të tij për ti bërë ata më konkurrues, më eficient, më të hapur në dobi të ekonomisë së vendit dhe mirëqënies konsumatore. Nëpërmjet monitorimeve, vlerësimit të ankesave dhe hetimeve, ka ndërhyrë në mënyrë të vazhdueshme në tregje me problematika të përsëritura si: tregu i karburanteve, tregu financiar dhe i sigurimeve, tregu i telefonisë celulare, tregu i energjisë, tregu i grumbullimit të duhanit, etj.


Gjatë këtij viti janë realizuar:

- 11 procedura hetimore përkatësisht në tregun e telefonisë celulare, sektorin bankar, tregun e ngarkim-shkarkimit në portin e Durrësit, tregun e distribucionit të filmave, tregun e tregtimit të lëndës së parë për prodhimin e brumit për bukë, tregu i shërbimit të mirëmbajtjes së kasave fiskale, tregu i furnizimit me karburant për avionë, tregu i transportit ajror, tregun e transportit ndërkombëtar detar, tregu i grumbullimit të duhanit dhe tregu i importit, depozitimit dhe shitjes së GLN;
- 16 autorizime për procedurat e përqendrimit.
- 6 procedura monitorimi përkatësisht në tregun e distribucionit të filmave që shfaqen në kinema, tregun e gazit të lëngshëm të naftës (GLN), tregun e telefonisë celulare, tregun e transportit ndërkombëtar detar, tregun e importit dhe ambalazhimit të kafesë si dhe tregun e importit dhe shitjes së cigareve;

Procedura hetimore në vite



- 47 vendime të marra nga KK, për procedura hetimore (paraprak dhe i thelluar), autorizime të përqendrimeve, rekomandime për vlerësime ligjore dhe ente rregullatore.



Viti	Vendime në total	Hetime të Praktikave të Marrëveshjeve të Ndalura	- Ndalim i Abuzimit me pozitën Dominuese - Kontroll i Përqëndrimeve	Advokacia e Konkurrencës (Rregullore, udhëzues, rekomandime etj)
2017	47	4 (3 tregje te hetuara)	23	20

Hetime të Praktikave të Marrëveshjeve të Ndalura

- Tregu i importit, shitjes me shumicë dhe pakicë të gazit të lëngshëm. Sekretariati nisur nga shqetësimet e mediave, nisi monitorimin e tregut të importit, shitjes me shumicë dhe pakicë të gazit të lëngshëm të naftës. Nga monitorimi u konstatua se në treg kishte subjekte që tregtonin me të njëjtin çmim, sjellje e cila mund të shkaktojë shqetësime për konkurrencën. Për këtë arsye, KK me vendimin nr. 446, datë 16.01.2017 vendosi hapjen e procedurës së hetimit paraprak në të gjitha segmentet e tregut të importit, depozitimit, shitjes me shumicë, shpërndarjes dhe shitjes me pakicë të produktit gaz i lëngshëm për konsum familjar dhe biznes, për të parë nëse ka, ose jo, shenja të kufizimit të konkurrencës. Në përfundim të raportit u konkludua se në të gjithë strukturën e funksionimit të tregut të ngarkim shkarkimit, importit, depozitimit dhe shitjes me shumicë të GLN-së nga zona e Porto Romanos kemi ndërmarrje të integruara vertikalisht, e cila rrit fuqinë e këtyre ndërmarrjeve, dhe mund të çojë në kufizime të konkurrencës në zbatim të ligjit 9121/2003. Autoriteti i Konkurrencës me vendimin nr. 454, datë 21.03.2017 vendosi hapjen e procedurës së hetimit të thelluar në tregun përkatës, për ndërmarrjet si vijon: "Romano Port" SH.A, "IB Gas AG", "Inter-Gaz" SH.A, "A&V Gas" SH.A, "AV Distribution" SH.A; "La Petrolifera Italo Albanese" SH.A, "Fam Gas", "Kevin Gaz" SH.A dhe "Emanuel Gas" SH.P.K..

Gjatë hetimit të thelluar nuk u gjetën evidenca direkte për të vërtetuar ekzistencën e një marrëveshje të ndaluar midis ndërmarrjeve sipas nenit 4 të ligjit nr. 9121/2013. Gjithashtu, sjellja e ndërmarrjeve ndaj çmimit të shitjes, duke aplikuar çmime të ndryshme me diferenca domethënëse për këtë treg, nuk përbën shenja të kufizimit të konkurrencës në kuptim të nenit 3, pika 4 dhe nenit 4 të ligjit nr. 9121/2003, si dhe Metodologjisë së OECD "Për zbulimin e karteleve me evidenca indirekte" në formën e një marrëveshje të ndaluar/praktike të bashkërenduar midis këtyre ndërmarrjeve; Në nivelin e tregtimit me shumicë konkudohet se nuk jemi para çmimeve të fiksuara në shitje në këtë nivel tregtimi. Çmimet e shitjes variojnë nga njëra ndërmarrje tek tjera, por duke ndjekur trajektoren e çmimeve të rritura të shitjes, transferuar nga çmimet e bursës ndërkombëtare të karburanteve PLATZ tek importuesit edhe më pas tek kjo kategori tregtimi.

KK me vendimin nr. 476, datë 05.10.2017 "Për zbatimin e Vendimit të Komisionit të Konkurrencës nr. 390, datë 22.12.2015 dhe mbylljen e hetimit të thelluar në të gjitha segmentet e tregut të ngarkim-shkarkimit, importit, depozitimit dhe shitjes me shumicë të produktit gaz i lëngshëm për konsum familjar dhe biznes", vendosi të japw rekomandime pwr Operatorit Shtetëror të Autorizuar, Ministrisë së Infrastrukturës dhe Energjisë dhe Ministrisë së Financave.

2. Tregu me pakicë i shërbimeve celulare. KK me vendimin nr.461, datë 23.05.2017 vendosi hapjen e procedurës së hetimit paraprak në tregun me pakicë të shërbimeve celulare, për të hetuar nëse ka, apo jo, shenja të kufizimit të konkurrencës. Lidhur me këtë treg pranë AK janë depozituar një numër i konsiderueshëm ankesash të cilat i referohet operatorëve ekonomikë në këtë treg. Tregu i telefonisë celulare ka strukturën e një tregu oligopolistik, më një operator me pozitë dominuese në tregun përkatës të shërbimeve celulare me pakicë, si dhe dy ndërmarrje të tjera me qëndrueshmëri të pjesëve të tregut. Të tre ndërmarrjet zotërojnë bashkërisht rreth 95% në tregun me pakicë të shërbimeve celulare dhe sipas parashikimeve të ligjit nr. 9121/2003 ekziston mundësia për të abuzuar me pozitën dominuese në treg.

Gjatë procedurës së hetimit paraprak u krye analiza së sjelljes së ndërmarrjeve që ushtrojnë aktivitet në tregun me pakicë të shërbimeve celulare, por në bazë të kësaj analize dhe inspektimeve të kryera pranë ndërmarrjeve nuk u gjetën evidenca direkte apo indirekte që të provojnë ekzistencën e ndonjë marrëveshjeje marrëveshjeje të ndaluar apo sjelljeje të bashkërenduar midis tyre në kuptim të nenit 4 të Ligjit Nr. 9121/2003, si dhe nuk u vërejtën shenja të abuzimit me pozitën dominuese në kuptim të nenit 9 të këtij Ligji.

Pas shqyrtimit të Raportit të Hetimit Paraprak, për nxitjen e konkurrencës së lirë dhe efektive në treg, Komisioni i Konkurrencës me vendimin Nr.475 datë 21.09.2017 vendosi të japë disa rekomandime për Autoritetin e Komunikimeve Elektronike dhe Postare dhe Komisionin e Mbrojtjes së Konsumatorit. Gjithashtu, Komisioni i Konkurrencës, vendosi ndaj ndërmarrjeve që operojnë në tregun e telefonisë celulare detyrimin që brenda 90 ditëve nga hyrja në fuqi e këtij vendimi të marrin masa për aplikimin dhe publikimin e çmimit për njësi për çdo shërbim (lekë/min., lekë/sms, lekë/MB, etj.) që përmbajnë paketat standarde, duke informuar Autoritetin e Konkurrencës.

Në përfundim, Komisioni i Konkurrencës vendosi mbylljen e procedurës së hetimit paraprak në tregun me pakicë të shërbimeve celulare duke lënë nën monitorim tregun me pakicë të shërbimeve celulare për një periudhë 1 (një) vjeçare, e cila fillon nga data 1 Tetor 2017. Gjatë periudhës së monitorimit ndërmarrjet që ushtrojnë veprimtari në këtë treg duhet të njoftojnë paraprakisht pranë Autoritetit të Konkurrencës të gjitha ndryshimet e kryera në paketa standarde, oferta promociionale, tarifa standarde, etj., që do të hedhin në treg.

3. *Tregu i distribucionit dhe shfaqjes së filmave në rrjetet e kinemave.* KK, pas shqyrtimit të raportit të monitorimit mbi tregun e distribucionit dhe shfaqjes së filmave për ndërmarrjet “Empire” SHPK (Empire), “Millenium” SHPK (Millenium) dhe “Cineplexx” SHPK (Cineplexx), në zbatim të nenit 42, pika 1, të ligjit nr. 9121/2003 me anë të vendimit nr. 466, datë 20.06.2017, “Për hapjen e procedurës së hetimit paraprak në tregun e distribucionit dhe shfaqjes së filmave në rrjetet e kinemave në Tiranë”, vendosi hapjen e hetimit për të parë nëse ka, ose jo, shenja të kufizimit të konkurrencës, për periudhën nga 01.01.2015 deri në 30.06.2017.

Nga analiza e sjelljes së ndërmarrjes me pozitë dominuese, Cineplexx, në tregun e shfaqjes së filmave në kinema në qytetin e Tiranës, bazuar në rezultatin financiar të ndërmarrjes, krahasimi me çmimet e rajonit (benchmark rajonal) dhe çmimet e rrjetit Cineplexx në rajon, si dhe çmimet me konkurrentët e tjerë në vend, rezultoi se nuk vërehen shenja të abuzimit me pozitën dominuese të ndërmarrjes Cineplexx, në kuptim të nenit 9, të ligjit nr. 9121/2003.

Nga analiza e sjelljes së ndërmarrjeve në treg, si pjesët e tregut, volumet e shitjeve, krahasimi i çmimeve të shitjes së biletave midis konkurrentëve dhe rezultati financiar negativ, nuk u vunë re shenja të koordinimit të sjelljes (marrëveshjes) midis ndërmarrjeve që ushtrojnë veprimtari në tregun e shfaqjes së filmave në kinema në qytetin e Tiranës, në kuptim të nenit 4 të ligjit nr. 9121/2003. Pra mund të themi që nuk jemi para rastit të një kufizimi të konkurrencës për marrëveshje, apo praktikë të bashkërenduar.

Megjithëse nuk u vunë re shenja të kufizimit të konkurrencës, në tregun përkatës ushtron veprimtari një ndërmarrje me pjesë të konsiderueshme dhe me fuqi tregu në rritje, Cineplexx, prandaj është e nevojshme mbikëqyrja e sjelljes së saj në vazhdimësi për të analizuar kushtet e tregut për zhvillimin e konkurrencës së lirë dhe efektive në treg në kuptim të nenit 28 të ligjit nr. 9121/2003 dhe tregu është në monitorim.

Ndalim i Abuzimit me pozitën Dominuese dhe Kontroll i Përqendrimeve

4. *Tregu i shërbimit funeral në Bashkinë Berat*

Pranë AK, u depozitua kërkesa-ankimore, në drejtim të Bashkisë së qytetit Berat dhe për dijeni: AK; Këshillit Bashkiak Berat; dhe Shoqërisë Soliar SHPK, me objekt mosfunksionimi i zhvillimit të aktivitetit funeral si pasojë e një marrëveshjeje të ndaluar që ka si objekt pengimin e konkurrencës.

Nga shqyrtimi i ankesës rezultoi se si rezultat i një procedure elektronike prokurimi, autoriteti kontraktor “Bashkia Berat” ka lidhur kontratën e shërbimit me objekt “Mirëmbajtje e varrezave publike dhe të varrezave Dëshmorët e Kombit Berat”, me operatorin ekonomik fitues “AB.Zoga” SHPK & “Pienvi” SHPK.

Referuar kontratës, shërbimi i mirëmbajtjes së varrezave publike dhe të Dëshmorëve të Kombit të Bashkisë Berat, konsiston në: ruajtjen e varrezave; pastrim prerje bari; ujitje bimësh dekorative; mirëmbajtje parcele ekzistuese; pastrim rruge e sheshe; rifreskim i germave të varrezave të dëshmorëve; pastrim varri prej mermeri në varrezat e dëshmorëve dhe në këtë objekt nuk rezulton të jetë i përfshirë administrimi i shërbimit funeral dhe mbledhja e tarifave për këtë shërbim.

Për sa më sipër, Bashkia Berat i ka dhënë operatorit ekonomik "AB.Zoga" SHPK & "Pienvi" SHPK, të drejtën dhe detyrimin e lidhjes së kontratave për shërbimin funeral me subjektet e licencuara që e ofrojnë këtë shërbim, si dhe të zbatojë tarifat e vendosura me Vendimin e Këshillit Bashkiak për këtë shërbim, i cili është jashtë objektit të kontratës. Projekt Akt-Marrëveshja objekt ankimimi i detyron palët e përfshira në këtë marrëveshje, “SOLIAR” SHPK dhe E.K. (Ankimuesi), që të lidhin një marrëveshje me subjektin “AB ZOGA” SHPK, subjekt i cili gjithashtu operon në të njëjtin treg përkatës si edhe dy subjektet e tjera.

KK me vendimin nr. 447, datë 16.01.2017 “Për dhënien e disa Rekomandimeve Bashkisë Berat për rritjen e konkurrencës në tregun e shërbimit funeral”, vendosi:

- T’i rekomandojë Bashkisë Berat: “Hapjen e tregut për konkurrencë të lirë në shërbimin e punimeve funerale duke vendosur kritere të njëjta për të gjithë operatorët që ofrojnë këtë shërbim.”

Nga Gjykata Administrative e Shkallës së Parë Vlorë jemi njoftuar nëpërmjet Fletë- Thirrjes për të marrë pjesë në proces si palë e tretë e interesuar.

5. Tregu i shërbimeve stivadore (ngarkim shkarkimi dhe aktivitetet e lidhura me to) për mallrat rifuxho në terminalin Lindor të Portit të Durrësit. Nga monitorimi i këtij tregu, është konstatuar se operatorët e licencuar stivadorë, janë bllokuar të punojnë, ata nuk lejohen të hyjnë në Terminalin Lindor për të kryer shërbime ndaj klientit, koncensionari nuk vë në përdorim vinçat të cilat i disponon vetëm ai, duke bllokuar anijet në port. Analiza e provave të administruara nga ana e shoqërisë Ankuese ASC SH.P.K, rezultateve të nxjerra nga ana e Kontrollit të Lartë të Shtetit në raportin e auditimit në Portin e Durrësit, provave të siguruara nga ana e korrespondencës me Ministrinë e Transportit dhe Infrastrukturës, si edhe monitorimit të realizuar nga Grupi i Punës, rezulton se mund ketë shkelje të Ligjit 9121/2003, ku përcaktohet se kjo sjellje nga ana e kësaj ndërmarrjeje mund të përbëjë abuzim me pozitën dominuese. Për këto arsye, me vendimin nr. 450, datë 28.02.2017, KK ka vendosur për hapjen e hetimit paraprak në tregun e shërbimit të ngarkim-shkarkim dhe aktivitetet e lidhura me to, për mallrat rifuxho në Terminalin Lindor të Portit të Durrësit. Gjithashtu, meqenëse ishim para rastit të shkaktimit të një dëmi të rëndë dhe të pariparueshëm të konkurrencës, KK me vendimin nr. 451, datë 28.02.2017 ka vendosur marrjen e masave të përkohshme për rivendosjen e

konkurrencës në tregun e shërbimit të ngarkim-shkarkimit dhe aktivitet e lidhura me to për mallrat rifuxho në Terminalin Lindor të Portit të Durrësit.

AK në bazë të nenit 45 të Ligjit Nr. 9121/2003 në përfundim të procedurave të hetimit paraprak, ftoi ndërmarrjen nën hetim, që në përgjigje të këtij vlerësimi paraprak, të marrë angazhime për eliminimin e kufizimeve të konkurrencës në këtë treg. AK vlerëson se për rivendosjen e konkurrencës së lirë dhe efektive në tregun përkatës duhet:

- ✓ Të zbatojë detyrimin ligjor për ofrimin e shërbimit të ngarkim-shkarkimit dhe shërbimet e lidhura me to për të gjithë operatorët e licencuar stivadorë që ushtrojnë veprimtarinë e tyre sipas licencës;
- ✓ Të lidhë marrëdhënie kontraktore me të gjithë operatorët e licencuar stivadorë me kushte të njëjta sipas kontratave/licencë me APD;
- ✓ Të respektojë të drejtën e përdoruesve të portit për të përzgjedhur vetë operatorin e përpunimit të mallrave (stivadorin);
- ✓ Të lejojë aksesin e operatorëve stivadorë të licencuar në Terminalin Lindor për të kryer shërbimet ndaj klientëve/përdoruesve të portit;
- ✓ EMS APO të vendosë në përdorim vinçat për të gjitha shoqëritë stivadore.

Në përfundim të hetimit paraprak KK konkludoi se: sjellja e ndërmarrjes me pozitë dominuese EMS APO, duke vendosur kushte të padrejta tregtimi dhe refuzuar aksesin në facilitetet e infrastrukturës që disponon ndaj ndërmarrjeve stivadore, në zbatim të nenit 9, pika 2, gërma a) dhe c) të ligjit nr. 9121/2003, mund të përbëjë abuzim me pozitën dominuese, me pasoja të rënda për konkurrencën në treg.

KK, me vendimin nr. 477, datë 12.10.2017 vendosi hapjen e procedurës së hetimit të thelluar ndaj ndërmarrjes “EMS-Albanian Port Operator” SHPK, në tregun e shërbimit të ngarkim-shkarkimit dhe aktivitetet e lidhura me to, për mallrat rifuxho në Terminalin Lindor të Portit të Durrësit. Autoriteti është duke realizuar seanca dëgjimore me palët e interesit.

6. Tregu i transportit ndërkombëtar detar të udhëtarëve dhe automjeteve. Pranë AK është depozituar një ankese e shoqërisë “Arkleand Bus” shpk lidhur me sjelljen e agjencisë “Gerverni Travel” shpk dhe “Euroferries” shpk të cilat veprojnë si përfaqësuese të tragetit “Northbay Transportes Marittimos LDA”, tragetit i vetëm që operon në linjën Vlorë-Brindisi dhe anasjelltas.

Sipas ankimesit, shoqëria Gerverni Travel si përfaqësuese e shoqërisë “Northbay Transportes Marittimos LDA”, ka rritur çmimet e biletave për pasagjerë (nga 22 në 50 dhe 60 euro së fundi dhe nga 180 në 208 euro për autobus) si dhe ka kërkuar nga shoqëria “Arkleand Bus” të lidhë një kontratë ekskluzive me kushte të papërbalueshme në formën e garancive bankare.

Për sa më lart, KK me vendimin nr. 455 të datës 28.03.2017 ka vendosur hapjen e procedurës së hetimit paraprak në tregun e transportit ndërkombëtar detar të udhëtarëve dhe automjeteve në portin e Vlorës.

Nga analiza e kryer gjatë procedurës së hetimit paraprak është evidentuar se ndërmarrja nën hetim ka zbatuar çmime brenda kufirit të përcaktuar me një akt nënligjor, nga Ministria e Transportit dhe Infrastrukturës. Në lidhje me pretendimin e kontratës me kushte dhe detyrime

financiare u konstatua se kjo ishte një draft kontratë, e cila nuk ishte nënshkruar nga palët, dhe në këto kushte nuk ka kufizime të konkurrencës në tregun përkatës. Me anë të vendimit nr. 467, datë 04.07.2017 KK vendosi:

- ✓ Detyrimin e ndërmarrjes “Northbay Transportes Marittimos Lda”, përfaqësuar nga “Gerverni Travel” SH.P.K, të zbatojë kushte të barabarta për veprime tregtare të njëjta me palët, për ti vendosur në gjendje të favorshme konkurrence;
 - ✓ Në rast të mos zbatimit të pikës së mësipërme, ndërmarrjet ndëshkohen me gjobë deri në 10 % të xhiros vjetore për shkelje të rëndë të konkurrencës;
 - ✓ Monitorimin e tregut të transportit ndërkombëtar detar të udhëtarëve dhe automjeteve në portin e Vlorës për periudhën nga data 04.07.2017 deri më 04.01.2018, me qëllim verifikimin e sjelljes së Ndërmarrjes “Northbay Transportes Marittimos Lda”;
1. T’i rekomandojë Ministrisë së Transportit dhe Infrastrukturës, që bazuar në Vendimin e KK, Nr. 349, datë 19.02.2015 “Për masat rregulluese dhe rekomandimet në tregun e transportit ndërkombëtar detar të udhëtarëve dhe automjeteve”, të realizojë:
- ✓ Monitorimin e zbatimit të tarifave sipas njoftimeve dhe miratimit të MTI-së për secilin traget/linjë kryesisht gjatë sezonit të lartë;
 - ✓ Sigurimin e të dhënave të detajuara mbi të gjitha kostot reale për shërbimin që ofrojnë operatorët;
 - ✓ Monitorimin e mbajtjes së të dhënave ditore për tarifat e aplikuara për çdo biletë të shitur, si dhe mbajtjes së rekordeve të shitjeve të biletave nga ndërmarrjet që operojnë në treg.

Tregu është në fazën e vlerësimit të rekomandimeve të dhëna dhe monitorimit të sjelljes së ndërmarrjes Northbay Transportes Marittimos Lda.

7. Tregtimi i produkteve lëndë e parë për prodhimin e brumrave për bukë dhe nën produktet e saj. Me Vendimin nr. 462, datë 23 .05.2017 Komisioni i Konkurrencës vendosi për hapjen e procedurës së hetimit paraprak në tregun e tregtimit të produkteve lëndë e parë për prodhimin e brumrave për bukë dhe nën produktet e saj, konkretisht ndaj ndërmarrjes "Nelly" Sh.p.k. Nga pretendimet e ankimesit si dhe faktet dhe provat e paraqitura prej tij rezulton se sjellja e ndërmarrjes "Nelly" sh.p.k., në tregun e tregëtimit të produkteve lëndë e parë për prodhimin e brumrave për bukë dhe nën produktet e saj, ka refuzuar të furnizojë ankimesit Z. Hysen CAKA, Z.Ardian CAKA dhe Znj. Lima CAKA me produkte "Maja" dhe "Miell" të markës "Zrnopan" të tipit "S", "Plus" dhe "T". Kjo sjellje mund të pengojë, kufizojë ose shtrembërojë konkurrencën në këtë treg, duke vendosur në kushte të pafavorshme konkurrence ankimesit. AK pasi ka kryer të gjitha investigimet e nevojshme dhe mblodhi informacionin e duhur për të vlerësuar konkurrencën në treg, me Vendimin nr. 472, datë 14.09.2017 vendosi për mbylljen e procedurës së hetimit paraprak në tregun e tregtimit të produkteve lëndë e parë për prodhimin e brumrave për bukë dhe nën produktet e saj, pasi pasi nuk ka shenja të kufizimit të konkurrencës, në bazë të nenit 9 të Ligjit Nr. 9121/2003.

8. Tregu i furnizimit me karburant të avionëve. Shoqata e Hidrokarbureve ka depozituar pranë AK një shkresë lidhur me problemet që lidhen me monopolin e furnizimit me kerozinë të avionëve në Tirana International Airport Nënë Tereza, në të cilën parashtrihen disa

shqetësime mbi pamundësinë e ndërmarrjeve që operojnë në tregun e importit dhe të shitjes së karburanteve, për të tregtuar karburante për avionë. KK me vendimin nr. 417, datë 18.05.2016, vendosi hapjen e procedurës së hetimit paraprak në tregun e furnizimit të avionëve me karburant, në zonën gjeografike të *Tirana International Airport Nënë Tereza* mbi ekzistencën ose jo të kufizimeve, shtrembërimeve apo pengimeve të konkurrencës, për periudhën hetimore 1.1.2015 - 18.5.2016. Nga analiza e tregut të furnizimit me karburant të avionëve JET A -1 karosene në *Tirana International Airport Nënë Tereza*, u konstatua se vetëm ndërmarrja “AIR BP ALBANIA”, është importuese dhe shitëse me shumicë për këtë produkt dhe se nga vlerësimi i bilanceve financiare të ndërmarrjes “AIR BP ALBANIA”, rezultoi se gjatë vitit 2015, fitimi pas tatimit është i konsiderueshëm, nëse krahasohet me tregun e karburanteve në vend.

KK me vendimin nr. 432-432/1, datë 14.9.2016, u shpreh për hapjen e procedurës së hetimit të thelluar në këtë treg, për periudhën janar 2014 – qershor 2016. Në lidhje me vlerësimin e sjelljes së ndërmarrjes më pozitive dominuese në tregun përkatës AIR BP Albania, mbi dhënien e aksesit për palët e tjera të interesuara për të ushtruar aktivitet pranë TIA, rezultoi se kjo ndërmarrje, nuk ka kufizuar asnjë ndërmarrje tjetër për të ushtruar aktivitet në tregun përkatës. Në lidhje me këtë treg, KK është shprehur me vendimin Nr. 116, datë 29.05.2009 “Për përjashtimin nga ndalimi të marrëveshjes midis “*Tirana International Airport*” SHPK dhe “*AIR BP Albania*” SH.A “Për sigurimin e depozitimit dhe tregtimit të karburantit për avionë, si dhe të shërbimit të furnizimit të avionëve në Aeroportin Ndërkombëtar të Tiranës ”Nënë Tereza”, nga ku ka rezultuar se marrëveshja midis TIA dhe AIR BP e lidhur më datë 24.02.2009, e njoftuar pranë AK, është përjashtuar në tërësi nga ndalimi, duke mos parashikuar ndonjë afat për përjashtimin e dhënë, gjë e cila nënkupton se ky përjashtim është deri në përfundim të afatit të vlefshmërisë së kësaj marrëveshje të përcaktuar në Pikën 2.1, deri në 22.04.2025.

Për sa më sipër, KK me vendimin nr. 470, datë 11.07.2017 pasi shqyrtoi raportin e përgatitur nga Sekretariati, pretendimet e palës që operon në tregun në hetim lidhur me këtë raport (të cilat u depozituan pranë institucionit me shkrim) vendosi:

- ✓ Mbylljen e procedurës së hetimit të thelluar në tregun e furnizimit të avionëve me karburant, në zonën gjeografike të *Tirana International Airport Nënë Tereza*;
- ✓ Monitorimin e këtij tregu për një vit nga dalja e vendimit për të vlerësuar sjelljen e ndërmarrjeve “AIR BP Albania” SH.A në lidhje me kërkesat potenciale nga palët e interesuara për të hyrë dhe për të ushtruar aktivitet në tregun përkatës.

Tregu është në monitorim

9. Tregu i transportit ajror të udhëtarëve ndaj ndërmarrjes Austrian Airlines.

Pranë AK, u paraqit ankesa nga disa pasagjerë, lidhur me sjelljen e shoqërisë ajrore Austrian Airlines.

Sipas ankuesve kjo shoqëri kishte ndryshuar itinerarin e udhëtimit dhe orarin e tij në momentin e fundit kur pasagjerët ishin paraqitur në aeroport, pa ndonjë paralajmërim paraprak.

Gjithashtu, pavarësisht se rezervimi dhe prerja e biletës ishte bërë për të fluturuar me avion të shoqërisë Austrian Airlines, kjo shoqëri i detyroi udhëtarët të fluturonin në itinerare të tjera me avionë të linjave të tjera, duke mos marrë shërbimin e paguar.

Duke pasur parasysh ankesën e depozituar pranë AK, pozicionin e ndërmarrjes Austrian Airlines, e cila operon e vetme në linjën direkte Tiranë – Vjenë dhe anasjelltas, si dhe fuqinë që kjo ndërmarrje ka për vendosjen e kushteve të tregtimit, mund të jemi para një kufizimi të mundshëm të konkurrencës nga kjo ndërmarrje në treg, në kuptim të nenit 9, të ligjit nr. 9121/2003.

Referuar sa më sipër, KK me vendimin nr. 490, datë 20.12.2017, “Për hapjen e hetimit paraprak në tregun e transportit ajror të udhëtarëve ndaj ndërmarrjes Austrian Airlines”, vendosi:

- Hapjen e procedurës së hetimit paraprak në tregun e transportit ajror të udhëtarëve ndaj ndërmarrjes Austrian Airlines;
- Hetimi paraprak të përfshijë periudhën kohore nga 1 Janar 2017 deri në 31 Dhjetor 2017.

Tregu është në procedure hetimore.

10. Tregu i shërbimit të mirëmbajtjes së pajisjeve fiskale për tregtimin e karburanteve

Pranë AK, u depozitua një ankesë lidhur me shërbimin e mirëmbajtjes së kasave fiskale për karburantet, për të cilin ka një kontratë me ndërmarrjen “AED”SHPK. Njëkohësisht, kjo ndërmarrje lidhur me problematikën me shoqëritë e autorizuar të pajisjeve fiskale AED dhe “Daisy &ETM”, të cilat kanë marrë përsipër për të ofruar të gjitha shërbimet e shoqërisë “CKV Noki Albania” SHPK, për shkak se kësaj shoqërie nuk ju rinovua Autorizimi nga ana e MFE.

Sipas ankuesit, nga ndërmarrja AED në mënyrë të njëanshme është njoftuar që për shkak të një detyrimi të prapambetur referuar Kontratë Shitje për Pajisje Fiskale që në vitin 2010 nuk do të ofrohet asnjë shërbim i kërkuar për asistencë dhe mirëmbajtje, gjë e cila ka dëmtuar procesin e shitjes së karburantit, duke qenë se Kasat Fiskale dhe distributorët janë në regjim automatik në bazë të parimit “Pa kupon nuk ka karburant”.

Duke vlerësuar ankesën e depozituar pranë AK dhe pozicionin e ndërmarrjeve që ofrojnë shërbimin e mirëmbajtjes së pajisjeve fiskale për tregtimin e karburanteve, të cilat janë të vetme për ofrimin e këtij shërbimi në treg, KK vlerësoi se mund të jemi para një kufizimi të mundshëm të konkurrencës nga këto ndërmarrje në treg, në kuptim të nenit 9, të ligjit nr. 9121/2003.

Referuar sa më sipër, KK me vendimin nr. 491, datë 28.12.2017 “Për hapjen e hetimit paraprak në tregun e shërbimit të mirëmbajtjes së pajisjeve fiskale për tregtimin e karburanteve”, vendosi hapjen e procedurës së hetimit paraprak në tregun e shërbimit të mirëmbajtjes së

pajisjeve fiskale për tregtimin e karburanteve, për periudhën kohore nga 1 Prill 2017 deri në 31 Dhjetor 2017.

Nga hetimi rezultoi se nuk përmbushen kushtet e refuzimit për të ofruar shërbimin në tregun përkatës, sipas nenit 9 të ligjit nr. 9121/2003.

Në përfundim, KK me vendimin nr. 493, datë 23.01.2018 “Për mbylljen e procedurës së hetimit paraprak në tregun e shërbimit të mirëmbajtjes së pajisjeve fiskale për tregtimin e karburanteve”, vendosi:

- Mbylljen e procedurës së hetimit paraprak në tregun e shërbimit të mirëmbajtjes së pajisjeve fiskale për tregtimin e karburanteve, pasi nuk ka shenja të kufizimit të konkurrencës, në bazë të nenit 9 të ligjit nr. 9121/2003.

Kontroll i Përqendrimeve

Gjatë vitit 2017, Autoriteti i Konkurrencës ka shqyrtuar 16 praktika të njoftimit të përqendrimeve. Bazuar në nenin 10 të Ligjit Nr 9121, datë 28.07.2003 “për Mbrojtjen e Konkurrencës”, i ndryshuar, i nënshtrohen procedurave të kontrollit të përqendrimeve në rastet kur shkaktohet një ndryshim i qëndrueshëm i kontrollit si pasojë e:

- bashkimit të dy ose më shumë ndërmarrjeve ose pjesë ndërmarrjesh të pavarura nga njëra-tjetra;
- përfitimit të kontrollit të drejtpërdrejtë ose të tërthortë, nga një ose më shumë persona fizikë, të cilët njëkohësisht kanë kontrollin e të paktën një ndërmarrjeje tjetër ose nga një ose më shumë ndërmarrje, mbi një ose më shumë ndërmarrje, ose të një pjese të këtyre të fundit, përmes blerjes së aksioneve, kuotave apo aseteve, kontratës ose çdo mjeti tjetër të ligjshëm;

kontrollit të drejtpërdrejtë ose të tërthortë mbi një ose më shumë ndërmarrje ose të një pjese të këtyre të fundit.

Për periudhën raportuese, Autorizimet e Komisionit janë si më poshtë:

1. Komisioni i Konkurrencës me **Vendimin Nr. 452, datë 07.03.2017** autorizoi përqendrimin e realizuar nëpërmjet përfitimit të kontrollit të shoqërisë **JT International Tirana SHPK nga shoqëria Marketing & Distribution SHPK nëpërmjet shoqërisë JT International Holding B.V.** Treg përkatës në këtë transaksion u konsiderua tregu i importit dhe tregtimit të duhanit. Ky transaksion nuk shfaq shenja të kufizimit të konkurrencës në treg ose në një pjesë të tij në veçanti, si rezultat i krijimit ose forcimit të pozitës dominuese.

Përqendrimi ndodh në tregun e brendshëm. Ai nuk do të sjell asnjë ndryshim në tregun përkatës. Marketing & Distribution SHPK do të mbetet në nivelin e 9% të tregut.

2. Komisioni i Konkurrencës me **Vendimin Nr. 456, datë 28.03.2017** autorizoi përqendrimin e realizuar nëpërmjet përfitimit të kontrollit të shoqërisë **Tobacco ress d.o.o. Mostar dhe Aseteve të Duhanit të Fabrika Duhana Sarajevo d.d. nga shoqëria British American Tobacco Investments Limited**. Treg përkatës në këtë transaksion u konsiderua tregu i importit dhe tregtimit të duhanit të prodhuar nëpërmjet makinerive (FMC).

Përqendrimi nuk ndodhi në tregun e brendshëm dhe nuk sjell asnjë ndryshim në pjesën e tregut të ndërmarrjes BAT Albania SHPK e cila do të mbetet në nivelin e 9% të tregut. Ky transaksion nuk shfaq shenja të kufizimit të konkurrencës në treg ose në një pjesë të tij në veçanti, si rezultat i krijimit ose forcimit të pozitës dominuese.

3. Komisioni i Konkurrencës me **Vendimin Nr. 457, datë 11.04.2017** autorizoi përqendrimin e realizuar nëpërmjet përfitimit të kontrollit të shoqërisë **Reynolds American Inc. nga shoqëria Batus Holding Inc..** Treg përkatës në këtë transaksion u konsiderua tregu i importit dhe tregtimit të duhanit të prodhuar nëpërmjet makinerive (FMC).

Përqendrimi nuk ndodh në tregun e brendshëm. Ai nuk sjell asnjë ndryshim dhe BAT Albania SHPK mbetet në nivelin e 9% të tregut. Ky transaksion nuk shfaq shenja të kufizimit të konkurrencës në treg ose në një pjesë të tij në veçanti, si rezultat i krijimit ose forcimit të pozitës dominuese.

4. Komisioni i Konkurrencës me **Vendimin Nr. 459, datë 25.04.2017** autorizoi përqendrimin e realizuar nëpërmjet përfitimit të kontrollit të shoqërisë **Fannie May Confections Brands Inc. nga shoqëria Ferrero International S.A.**

Treg përkatës në këtë transaksion u konsiderua tregu prodhimit dhe shitjes së ëmbëlsirave prej çokollate; tregu i prodhimit dhe shitjes së ëmbëlsirave në formë kremi; tregu i prodhimit dhe shitjes së ëmbëlsirave me përmbajtje qumështi dhe snacks të ëmbël; dhe tregu i prodhimit dhe shitjes së ëmbëlsirave prej sheqeri. Ky transaksion nuk shfaq shenja të kufizimit të konkurrencës në treg ose në një pjesë të tij në veçanti, si rezultat i krijimit ose forcimit të pozitës dominuese. Përqendrimi nuk ndodh në tregun e brendshëm. Ai nuk do të sjell asnjë ndryshim.

5. Komisioni i Konkurrencës me **Vendimin Nr. 463, datë 06.06.2017** autorizoi përqendrimin e realizuar nëpërmjet krijimit të një ndërmarrjeje të re të pavarur me funksione të plota ndërmjet shoqërive **BMW AG / Daimler AG / Ford Motor Company / Dr.Ing. h.c.F. Porsche Aktiengesellschaft**.

Treg përkatës në këtë transaksion u konsiderua tregu për instalimin, operimin dhe mirëmbajtjen e një infrastrukture karikimi publike të aksesueshme për automjetet elektrike me bateri (BEV). Ky transaksion nuk shfaq shenja të kufizimit të konkurrencës në treg ose në një pjesë të tij në veçanti, si rezultat i krijimit ose forcimit të pozitës dominuese. Përqendrimi nuk ndodh në tregun e brendshëm. Ai nuk do të sjell asnjë ndryshim.

6. Komisioni i Konkurrencës me **Vendimin Nr. 464, datë 06.06.2017** autorizoi përqendrimin e realizuar nëpërmjet përfitimit të rrjetit të shpërndarjes së shoqërisë **Fabrika Duhana AD**

Banja Luka si dhe përfitimi i 100% i aksioneve të Express Logistic and Distribution EOOD nga British American Tobacco Eastern Europe Commercial Trading Limited.

Treg përkatës në këtë transaksion u konsiderua tregu i importit dhe tregtimit të duhanit të prodhuar nëpërmjet makinerive (FMC).

Përqendrimi nuk ndodh në tregun e brendshëm. Ai nuk do të sjell asnjë ndryshim. BAT Albania SHPK do të mbetet në nivelin e 9% të tregut. Ky transaksion nuk shfaq shenja të kufizimit të konkurrencës në treg ose në një pjesë të tij në veçanti, si rezultat i krijimit ose forcimit të pozitës dominuese.

7. Komisioni i Konkurrencës me **Vendimin Nr. 465, datë 20.06.2017** autorizoi përqendrimin e realizuar nëpërmjet përfitimit të kontrollit mbi shitjen dhe transferimin e kuotës **prej 49% të ndërmarrjes ITD SHPK, nga Investment Joti-Infosoft Group SHPK tek Balfin SHPK.** Treg përkatës në këtë transaksion u konsiderua tregu i importit dhe tregtimit me shumicë të pajisjeve kompjuterike, softëare dhe hardëare.

Përqendrimi ndodh në tregun e brendshëm. Blerësi nuk ushtron aktivitet në tregun objekt transaksioni dhe përqendrimi nuk do të sjell asnjë ndryshim në treg. ITD SHPK do të mbetet në nivelin e 22.7% të tregut. Ky transaksion nuk shfaq shenja të kufizimit të konkurrencës në treg ose në një pjesë të tij në veçanti, si rezultat i krijimit ose forcimit të pozitës dominuese.

8. Komisioni i Konkurrencës me **Vendimin Nr. 468, datë 04.07.2017** autorizoi përqendrimin e realizuar nëpërmjet përfitimit të kontrollit mbi shitjen dhe transferimin e kuotës **prej 100% të ndërmarrjes Compal Electronics Europe spz.o.o. nga Compal Electronics B.V. tek Vestel Ticaret A.S.**

Treg përkatës në këtë transaksion u konsiderua tregu i prodhimit dhe shitjes të aparateve të televizorit LCD. Me qenë se në territorin e Shqipërisë nuk ka ndërmarrje të cilat operojnë në tregun e prodhimit të aparateve të televizorëve LCD, treg përkatës produkti do të konsiderojmë vetëm tregun e shitjes të aparateve të televizorëve LCD. Ky transaksion nuk shfaq shenja të kufizimit të konkurrencës në treg ose në një pjesë të tij në veçanti, si rezultat i krijimit ose forcimit të pozitës dominuese.

Përqendrimi nuk ndodh në tregun e brendshëm. Ai nuk do të sjell asnjë ndryshim.

9. Komisioni i Konkurrencës me **Vendimin Nr. 473, datë 14.09.2017** autorizoi përqendrimin e realizuar nëpërmjet blerjes së aseteve të **ndërmarrjes Izi Mobil Telekomunikacije d.d. nga Telekom Slovenije d.d..** Treg përkatës në këtë transaksion u konsiderua tregu i shërbimeve të telekomunikacionit të lëvizshëm për klientët fundor dhe tregu i aksesit me shumicë dhe origjinën e thirrjeve në rrjetet publike të lëvizshme.

Përqendrimi nuk ndodh në tregun e brendshëm. Ai nuk sjell asnjë ndryshim në tregun përkatës. Ky transaksion nuk shfaq shenja të kufizimit të konkurrencës në treg ose në një pjesë të tij në veçanti, si rezultat i krijimit ose forcimit të pozitës dominuese.

10. Komisioni i Konkurrencës me **Vendimin Nr. 474, datë 14.09.2017** autorizoi përqendrimin e realizuar nëpërmjet blerjes së disa aseteve, detyrimeve dhe marrëdhënieve ligjore të **ndërmarrjes Veneto Banca S.p.A. nga Intesa Sanpaolo S.p.A.** Treg përkatës në këtë transaksion u konsiderua tregu i shërbimeve bankare. Përqendrimi nuk ndodh në tregun e brendshëm.

Ai do të sjell ndryshim në tregun e brendshëm si më poshtë:

Tregu i aktiveve: Intesa Sanpaolo zë 10.48%, Veneto zë 1.85%. Pas përqendrimit pjesa e kombinuar e tyre shkon në 12.33%.

Tregu i depozitave: Intesa Sanpaolo zë 10.82%, Veneto zë 1.94%. Pas përqendrimit pjesa e kombinuar e tyre shkon në 12.76%.

Tregu i Kredive: Intesa Sanpaolo zë 8.03%, Veneto zë 1.94%. Pas përqendrimit pjesa e kombinuar e tyre shkon në 9.97%.

Ky transaksion nuk shfaq shenja të kufizimit të konkurrencës në treg ose në një pjesë të tij në veçanti, pasi pas transaksionit blerësi nuk krijon ose forcon pozitën dominuese.

11. Komisioni i Konkurrencës me **Vendimin Nr. 478, datë 26.10.2017** autorizoi përqendrimin e realizuar nëpërmjet përfitimit të kontrollit mbi **shitjen dhe transferimin e kuotës prej 90% të ndërmarrjes Insig Jete SHA, nga Eurosig SHA tek Z. Shefqet Kastrati dhe Z. Samir Mane.** Treg përkatës në këtë transaksion u konsiderua tregu i sigurimit të jetës.

Përqendrimi ndodh në tregun e brendshëm. Blerësit nuk kanë qenë aktiv në tregun përkatës dhe Insig Jete SHA do të mbetet në nivelin e 11.69% të tregut. Ky transaksion nuk shfaq shenja të kufizimit të konkurrencës në treg ose në një pjesë të tij në veçanti, si rezultat i krijimit ose forcimit të pozitës dominuese.

12. Komisioni i Konkurrencës me **Vendimin Nr. 480, datë 09.11.2017** autorizoi përqendrimin e realizuar nëpërmjet shitjes dhe transferimit të aksioneve të **ndërmarrjes Jordan d.o.o. tek Telekom Slovenije d.d.** Treg përkatës në këtë transaksion u konsiderua tregu i shërbimit roaming dhe shërbimet e telefonisë fikse me shumicë për inter-operatorët.

Përqendrimi nuk ndodh në tregun e brendshëm. Ai nuk do të sjell asnjë ndryshim treg dhe nuk shfaq shenja të kufizimit të konkurrencës në treg ose në një pjesë të tij në veçanti, si rezultat i krijimit ose forcimit të pozitës dominuese..

13. Komisioni i Konkurrencës me **Vendimin Nr. 484, datë 23.11.2017** autorizoi përqendrimin e realizuar nëpërmjet **transferimit të ½ të spektrit të ndërmarrjes Plus Communication SHA tek Vodafone Albania SHA.** Treg përkatës në këtë transaksion do konsiderohet tregu i frekuencave dhënë në përdorim të operatorit Plus Communication SHA nga AKEP (frekuencat GSM 900MHz, 1800MHz dhe 2100MHz).

Përqendrimi ndodh në tregun e brendshëm. Ai do të sjell ndryshim në tregun e frekuencave ku Vodafone Albania SHA do të arrijë në nivelin e 40% të tregut për frekuencat 900MHz, 38% të tregut për frekuencat 1800MHz dhe 42% të tregut për frekuencat 2100MHz.

Transaksioni u autorizua pas miratimit paraprak të transferimit të spektrit të frekuencave nga Bordi i AKEP.

Transaksioni është autorizuar pasi nuk shfaq shenja të kufizimit të konkurrencës në tregun përkatës ose në një pjesë të tij në veçanti, si rezultat i krijimit ose forcimit të pozitës dominuese, por në bashkëpunim me AKEP, ky treg do të vazhdojë të jetë objekt monitorimi dhe vlerësimi për të parë ndryshimet strukturore pas përqendrimit.

14. Komisioni i Konkurrencës me **Vendimin Nr. 485, datë 23.11.2017** autorizoi përqendrimin e realizuar nëpërmjet **transferimit të ½ të spektrit të ndërmarrjes Plus Communication SHA tek Telekom Albania SHA**. Treg përkatës në këtë transaksion do konsiderohet tregu i frekuencave dhënë në përdorim të operatorit Plus Communication SHA nga AKEP (frekuencat GSM 900MHz, 1800MHz dhe 2100MHz).

Përqendrimi ndodh në tregun e brendshëm. Ai do të sjell ndryshim dhe Telekom Albania SHA do të arrijë në nivelin e 36% të tregut për frekuencat 900MHz, 34% të tregut për frekuencat 1800MHz dhe 33% të tregut për frekuencat 2100MHz.

Transaksioni u autorizua pas miratimit paraprak të transferimit të spektrit të frekuencave nga Bordi i AKEP.

Transaksioni është autorizuar pasi nuk shfaq shenja të kufizimit të konkurrencës në tregun përkatës ose në një pjesë të tij në veçanti, si rezultat i krijimit ose forcimit të pozitës dominuese, por në bashkëpunim me AKEP, ky treg do të vazhdojë të jetë objekt monitorimi dhe vlerësimi për të parë ndryshimet strukturore pas përqendrimit.

15. Komisioni i Konkurrencës me **Vendimin Nr. 486, datë 05.12.2017** autorizoi përqendrimin e realizuar nëpërmjet **bashkimit të ndërmarrjes Fitzroy Merger CO, tërësisht e kontrolluar nga CTH Invest S.A. me Ferrara Candy Company Holdings Inc.** Përqendrimi u njoftua me shkresën Nr. 422 Prot., datë 16.10.2017. Treg përkatës në këtë transaksion do konsiderohet: tregu i prodhimit dhe shitjes së ëmbëlsirave prej çokollate; tregu i prodhimit dhe shitjes së ëmbëlsirave në formë kremi; tregu i prodhimit dhe shitjes së ëmbëlsirave me përmbajtje qumështi si snack të freskët dhe ëmbëlsira të ftohta dhe; tregu i prodhimit dhe shitjes së ëmbëlsirave prej sheqeri.

Përqendrimi nuk ndodh në tregun e brendshëm dhe nuk do të sjell asnjë ndryshim në të. Ky transaksion nuk shfaq shenja të kufizimit të konkurrencës në treg ose në një pjesë të tij në veçanti, si rezultat i krijimit ose forcimit të pozitës dominuese.

16. Komisioni i Konkurrencës me **Vendimin Nr. 487, datë 05.12.2017** autorizoi përqendrimin e realizuar nëpërmjet **përfitimit të kontrollit mbi Portofolin e Kredisë së Procredit Bank AD**

Beograd nga Banca Intesa AD Beograd. Treg përkatës në këtë transaksion do konsiderohet do të konsiderohet tregu i shërbimeve bankare.

Përqendrimi nuk ndodh në tregun e brendshëm. Ai nuk do të sjell asnjë ndryshim. Ky transaksion nuk shfaq shenja të kufizimit të konkurrencës në treg ose në një pjesë të tij në veçanti, si rezultat i krijimit ose forcimit të pozitës dominuese.

Rastet e njoftuara të cilat nuk kanë qenë objekt vlerësimi sipas nenit 10 dhe 12 të Ligjit 9121/2003.

- Vlerësim ligjor mbi: “Transaksionin e përfitimit të kontrollit të përbashkët mbi shoqërinë Kaican Services Limited nga shoqëria CCP II Acquisition Luxo III S.a.r.l. dhe Alpha Bank S.A. nëpërmjet Aktua Hellas Hollding S.A.”
- Vlerësim ligjor mbi “Transaksionin e transformimit në një ndërmarrje me funksion të plotë të BUYIN, një ndërmarrje e përbashkët e kontrolluar në mënyrë të përbashkët nga Deutsche Telekom AG dhe Orange S.A.”
- Vlerësim ligjor mbi “Transaksionin e bashkimit të shoqërive Shkodra Region Beteiligungsholding GmbH dhe Ashta Beteiligungsholding GmbH ku shoqëria Ashta Beteiligungsholding GmbH do të vazhdojë të ekzistojë pas bashkimit”
- Vlerësim ligjor mbi “Transaksionin e blerjes së kuotave të shoqërisë Scuttary SHPK nga shoqëria ABCOM SHPK”
- Vlerësim ligjor mbi “Transaksionin mes Charme Capital Partners SGR S.p.A. me Fiocchi Munizioni S.p.A”
- Vlerësim ligjor mbi “Transaksionin financiar që do të ndodhë në lidhje me blerjen e kuotave të ndërmarrjes Mbrostallar SHPK nga ABCom SHPK”.

Avokacia e Konkurrencës (Rregullore, udhëzues, rekomandime etj)

Në kuadër të procesit të përafrimit të legjislacionit dhe Planit Kombëtar të Integritimit Europian, gjatë 2017, AK miratoi nismat ligjore, si më poshtë:

1. Rregullorja “Për kategoritë e marrëveshjeve të transferimit të teknologjisë”, miratuar me vendimin nr. 489, datë 20.12.2017 të KK

Kjo rregullore është përshtatur dhe përafruar plotësisht me Rregulloren e Komisionit (BE) nr. 316/2014, datë 21 Mars 2014 "Për zbatimin e nenit 101(3) të Traktatit për Funkcionimin e Bashkimit Evropian për Kategoritë e Marrëveshjeve të Transferimit të Teknologjisë"¹.

Rregullorja e re plotëson kuadrin ligjor në fushën e konkurrencës, duke parashikuar mënyrën se si kryhet procesi i vlerësimit për kategoritë e marrëveshjeve të transferimit teknologjik. Nëpërmjet kësaj Rregullore, rregullohet shprehimisht që marrëveshjet e transferimit të teknologjisë të lidhura ndërmjet dy ndërmarrjeve që lejojnë prodhimin e produkteve të kontraktuara u njihet e drejta e përjashtimit nga kategoria e marrëveshjeve të ndaluara, me

¹ Rregullorja “Për kategoritë e marrëveshjeve të transfertave teknologjike”, miratuar me VKK nr.179 datë 2.3.2011, shfuqizohet

kusht që pjesa e kombinuar e palëve në treg të mos tejkalojë 20% të tregut përkatës të prekur. Në lidhje, me ndërmarrjet, palë të një marrëveshjeje, të cilat nuk janë ndërmarrje në të njëjtin treg përkatës, përjashtimi do të zbatohet me kusht që pjesa e tregut e secilës palë të mos tejkalojë 30% të tregut përkatës të prekur.

2. Broshure Informuese “Programi i përputhshmërisë me rregullat e konkurrencës”

Ky dokument bazohet në të njëjtin dokument që Komisioni Evropian ka përgatitur për komunitetin e biznesit si dhe është mbështetur në praktikat më të mira dhe të njëjtat programe që kanë hartuar autoritete homologe apo vende anëtare të tjera të BE-së.

Nëpërmjet këtij dokumenti, AK synon të inkurajojë ndërmarrjet që të investojnë burimet e nevojshme njerëzore, të cilat do t'i ndihmojnë ato (ndërmarrjet) të kuptojnë sesi përputhshmëria me rregullat e konkurrencës mund të jetë një investim fitimprurës për to dhe, si të parandalohet shkelja e rregullave të konkurrencës duke vepruar sipas standardeve ligjore dhe etike në fushën e konkurrencës.

Gjatë 2017, AK ka ndërhyrë në tregjet e rregulluara nëpërmjet rekomandimeve përkatëse për entet rregullatorë, si Autoriteti i Komunikimeve Elektronike e Postare (AKEP), për tregun e telefonisë celulare dhe Entin Rregullator të Energjisë (ERE) për tregun e energjisë.

- 1.** KK me Vendimin Nr. 447 , datë 16.01.2017 i ka rekomanduar Bashkisë Berat ndërmarrjen e veprimeve për rritjen e konkurrencës në tregun e shërbimit funeral. Pranë AK është depozituar një ankesë ku pretendohet për mosfunksionimin e zhvillimit të aktivitetit funeral si pasojë e një marrëveshjeje të ndaluar që ka si objekt pengimin e konkurrencës. Pas vlerësimit të ankesës, KK vendosi t'i rekomandojë Bashkisë Berat, hapjen e tregut për konkurrencë të lirë në shërbimin e punimeve funerale duke vendosur kritere të njëjta për të gjithë operatorët që ofrojnë këtë shërbim.
- 2.** AMF depozitoi ankimimin administrativ për revokim të pjesshëm të vendimit të KK, për pjesën e rekomandimeve të dhëna AMF. KK pasi e shqyrtoi ankimin, u shpreh me vendimin nr. 448, duke rrëzuar ankimimin dhe duke lënë në fuqi vendimin nr. 443, datë 30.11.2016 “Për masat dhe detyrime për ndërmarrjet e sigurimit dhe disa rekomandime për Autoritetin e Mbikëqyrjes Financiare mbi rivendosjen e konkurrencës në tregun e sigurimit të detyrueshëm motorik, për përgjegjësinë ndaj palëve të treta”.
- 3.** Me vendimin nr. 449 datë 21.02.2017 miratoi “Raportin Vjetor 2016, Sfidat e Institucionit për vitin 2017”.
- 4.** Me vendimin nr. 458 datë 14.04.2017 zgjodhi Zv/Kryetarin e Komisionit të Konkurrencës.
- 5.** Enti Rregullator i Energjisë ka dërguar pranë AK vendimin e bordit të ERE-së “*Mbi certifikimin paraprak të Shoqërisë Operatori i Kombinuar i Gazit Natyror Albgez SHA*”. Me Vendimin nr. 469, datë 11.07.2017, KK i rekomandoi ERE:
 - Dizenjimin dhe miratimin e Modelit dhe Rregullave të Tregut të Gazit Natyror në Shqipëri, ku të parashikohen mënyra e organizimit, funksionimit dhe ndërveprimit mes Operatorit të

Kombinuar të gazit natyror Albgaz SHA me OST, OSSH, Prodhim, Impiantet e Përpunimit, Furnizimit, Depozitimit dhe operatorëve të tjerë;

- Në miratimin paraprak të Operatorit të Kombinuar të Gazit Natyror Albgaz SHA të parashikohet ndarja e llogarive për secilën nga veprimtaritë e tij.

6. KK në mbledhjen e datës 25 korrik 2017, ka shqyrtuar ankesën e depozituar nga Ora News” SH.A, ku pretendohet për parregullsi në lidhje me procedurën e vendimmarrjes nga ana e Autoritetit të Mediave Audiovizive (AMA). KK me vendimin nr .471, datë 25.07.2017 ka vlerësuar se pretendimi i ngritur është jashtë kompetence, duke ja përcjellë ankesën Autoritetit të Mediave Audiovizive.

7. Komisioni i Konkurrencës me vendimin nr.475 datë 21.09.2017 vendosi t’i rekomandojë

- Autoritetit të Komunikimeve Elektronike dhe Postare, si vijon: 1.1 Të njoftojë Autoritetin e Konkurrencës për çdo paketë standarde/oferta të njoftuar nga ndërmarrjet që operojnë në tregun e telefonisë celulare që sjell efekte antikonkurrese në treg në përmbushje të detyrimeve ligjore të përcaktuara në nenin 12, nenin 38 dhe nenit 61 të Ligjit Nr. 9918/2008; 1.2 Të kërkojë opinionin e Autoritetit të Konkurrencës për çdo ndryshim të strukturës së tregut që mund të sjellë pasoja për konkurrencën; 1.3 Brenda 90 ditëve nga data e hyrjes në fuqi të këtij vendimi, në bazë të nenit 70 të Ligjit Nr. 9121/2003, të marrë masat si vijon: a. Të bëjë vlerësimin e paketave 28 ditore dhe 30 ditore për të vlerësuar nëse ka efekte negative për konsumatorin duke u shprehur me vendim të Këshillit Drejtues të AKEP-it; b. Ndryshimin e nenit 8 të Rregullores Nr. 27/2012 “Mbi publikimin e informacionit për tarifat si dhe kushtet e aksesit dhe përdorimit të shërbimeve të komunikimeve elektronike publike”, duke parashikuar detyrimin e ndërmarrjeve për njoftimin në AKEP përpara bërjes efektive të miratimit të tarifave/ndryshimeve; c. Të përcaktojë për operatorët e shërbimit celular detyrimin që përveç çmimit të paketës standarde nga ana e ndërmarrjeve të publikohet dhe çmimi për njësi për çdo shërbim (lekë/min., lekë/sms, lekë/MB, etj.), që këto paketa përmbajnë; d. Të parashtrijë përpara Autoritetit të Konkurrencës duke kërkuar fillimin e procedurave përkatëse ligjore për çdo rast për të cilin konstaton sjellje antikonkurrese nga ana e ndërmarrjeve që ushtrojnë veprimtari në tregun e komunikimeve elektronike; e. Të kryej analiza për zhvillimin dhe orientimin drejt kostos së tarifave standarde të aplikuara për përdoruesit me parapagesë, që përdorin tarifat standarde jashtë ofertave për operatorët me fuqi të ndjeshme në këtë treg.
- Ti rekomandojë Komisionit të Mbrojtjes së Konsumatorit, si vijon: 2.1 Të kërkojë nga ana e operatorëve të telefonisë celulare përmbushjen e detyrimit që për çdo ndryshim apo hedhje të paketave të reja në treg që ka efekt të drejtpërdrejtë tek konsumatori të kërkojë transparencë çmimi për njësi për çdo shërbim të ofruar (lekë/min., lekë/sms, lekë/MB, etj.);
- Ndërmarrjet që operojnë në tregun e telefonisë celulare brenda 90 ditëve nga hyrja në fuqi e këtij vendimi të marrin masa për aplikimin dhe publikimin e çmimit për njësi për çdo shërbim (lekë/min., lekë/sms, lekë/MB, etj.) që përmbajnë paketat standarde, duke informuar Autoritetin e Konkurrencës; 4. Monitorimin nga ana e Autoritetit të Konkurrencës të tregut me pakicë të shërbimeve celulare për një periudhë 1 (një) vjeçare,

e cila fillon nga data 1 Tetor 2017. 5. Gjatë periudhës së monitorimit ndërmarrjet që ushtrojnë veprimtari në këtë treg duhet të njoftojnë paraprakisht pranë Autoritetit të Konkurrencës të gjitha ndryshimet e kryera në paketa standarde, oferta promociionale, tarifa standarde, etj., që do të hedhin në treg; 6. Mbylljen e procedurës së hetimit paraprak në tregun me pakicë të shërbimeve celulare; 11 7. Ngarkohet Sekretari i Përgjithshëm për njoftimin e këtij vendimi

8. KK me vendimin nr. 453, datë 07.03.2017 vendosi:

- T'i rekomandojë *Bankës së Shqipërisë*:
 - Rishikimin e Memorandumit të Mirëkuptimit midis BSH dhe AK;
 - Riformulimin e dy pikave të Rregullores së Bankës së Shqipërisë "*Mbi transparencën për produktet dhe shërbimet bankare e financiare*" si vijon:
 - "*Banka duhet të parashikojë në kontratën e llogarisë dhe të depozitës mënyrën e njoftimit të klientit për ndryshimin e kushteve të punës. Para se të aplikojë ndryshimin, në kushtet e rinovimit të kontratës, banka të marrë pëlqimin e klientit*";
 - Identifikimin dhe adoptimin e masave të mundshme për uljen e kostove të transfertave në nisje dhe në mbërritje në monedhë të huaj, kryesisht euro dhe dollar amerikan, nga një bankë te një bankë tjetër brenda vendit. Kjo do të çojë në nxitjen e qarkullimit të monedhës së huaj në kanalet bankare, dhe do të ndihmojë në uljen e përdorimit të parasë cash në ekonomi;
 - Stimulimin dhe promovimin e shërbimit *E - banking* nga BSH dhe bankat me qëllim nxitjen e aftësisë konkurruese të konkurrentëve më të vegjël si dhe të hyrësve të rinj në sistemin bankar dhe rritjen e përfitimeve të këtij shërbimi nga klientët;
 - Identifikimin dhe marrjen e nismave për rregullimin e mëtejshëm të kuadrit ligjor/rregullator, në bashkëpunim edhe me institucione të tjera përgjegjëse, me qëllim uljen në të ardhmen të përdorimit të transaksioneve *cash* në ekonomi.
- T'i rekomandojë *Shoqatës Shqiptare të Bankave*:
 - Ndërmarrjen e nismës për krijimin e "*Kodit të Sjelljes*" nga bankat e nivelit të dytë që nuk e kanë ende një Kod të Sjelljes/Kod Etike dhe publikimin dukshëm të tij në faqen zyrtare dhe ambientet e bankës, me qëllim rritjen e transparencës së bankave në shërbimet dhe produktet që ato u ofrojnë klientëve.
- T'i rekomandojë *Bankave të nivelit të dytë*:
 - T'i mundësojnë klientit për zgjedhjen e vlerësuesit dhe të noterit në një listë të përzgjedhur të bankës, me qëllim rritjen e konkurrencës mes ofruesve të këtyre shërbimeve;
 - Nxitja e kartave lokale, që nuk kanë kosto të larta si kartat që emetohen nga skemat ndërkombëtare (MasterCard, apo Visa etj.,) që do të mundësonin më shumë përdorim dhe pranim të pagesave pasi kostot do të ishin më të ulta edhe për bankat rrjedhimisht edhe për klientët;
 - Të krijojnë lehtësira për lëvizshmërinë e klientëve duke ulur kostot "bllokuese" (kostot të cilat e detyrojnë klientin të qëndrojë pranë një banke si komisione për mbyllje llogarie, kosto administrative për klientin si kohë, rimbushje formularësh, përgatitje dokumentacioni,

përdorimi i teknologjive të reja për tu afruar më shumë lehtësi tek klientët) si dhe të rrisin transparencën duke i bërë më të kuptueshme këto kosto për klientin, përfshirë edhe skedën e amortizimit të kredisë, e cila duhet të jetë në gjuhën shqipe në të gjitha bankat dhe për të gjitha rastet.

- Bankat të bashkëpunojnë me Policinë e Shtetit dhe Shoqëritë e Ruajtjes së Sigurisë Fizike për të rritur sigurimin e transportit të vlerave monetare brenda dhe jashtë vendit.

Banka e Shqipërisë me anë të Vendimit Nr. 25, datë 3.5.2017 “Për disa ndryshime në rregulloren “Mbi transparencën për produktet dhe shërbimet bankare e financiare”, ka pasqyruar rekomandimin e dhënë nga KK. Ky rekomandim është reflektuar në ndryshimin e pikës 4, të nenit 5 të Rregullores së mësipërme si vijon:

“4. Bankat, në rastet kur ndryshojnë kushtet e ofrimit të produkteve dhe shërbimeve bankare apo financiare, njoftojnë:

- Në mënyrë individuale, secilin klient që është subjekt i këtyre ndryshimeve, sipas afatit dhe formës së përcaktuar në kontratën ndërmjet palëve (me shkrim, nëpërmjet mjeteve të qëndrueshme të komunikimit ose mesazheve telefonike) dhe të dokumentuar nga banka; si dhe
- Nëpërmjet afishimit të njoftimeve ose broshurave në ambientet e bankës, në faqen zyrtare të internetit ose me mjetet e komunikimit masiv.

Ky njoftim kryhet të paktën 15 ditë përpara se ndryshimet të bëhen të aplikueshme. Njoftimi duhet të përmbajë informacion të saktë, të plotë dhe të shprehur në një gjuhë të kuptueshme për klientin. Në çdo rast, kushtet e kontratës nuk mund të ndryshohen pa u dhënë pëlqimi i klientit sipas përcaktimeve të kontratës.”

BSH ka bërë dhe ndryshimin e pikës 4 të nenit 9, si vijon: “Banka duhet të parashikojë në kontratën e llogarisë rrjedhëse dhe të kursimit, mënyrën e njoftimit të klientit për ndryshimin e kushteve të kontratës së nënshkruar, para se të aplikojë ndryshimin.”.

Bankat e nivelit të dytë (*ProCredit Bank, Banka Credins, Tirana Bank, Banka e Bashkuar e Shqipërisë, Union Bank, Banka Raiffeisen, FiBank, Intesa San Paolo Bank*) në përgjigje të rekomandimeve të dhëna nga KK, kanë marrë përsipër përmbushjen e këtyre rekomandimeve, në përputhje edhe me kuadrin ligjor që rregullon veprimtarinë e tyre në Republikën e Shqipërisë.

AK, do të jetë në proces të monitorimit të përmbushjes së këtyre rekomandimeve nga ana e Bankave të nivelit të dytë.

Shoqata Shqiptare e Bankave, në përgjigjen e saj, bën me dije se lidhur me rekomandimin e dhënë nga KK, mbi ndërmarrjen e nismës për krijimin e “Kodit të Sjelljes” nga bankat e nivelit të dytë dhe publikimin dukshëm të tij në faqen zyrtare dhe ambientet e bankës, nga Shoqata Shqiptare e Bankave është ndërmarrë kjo nismë dhe aktualisht 11 (njëmbëdhjetë) banka e kanë të publikuar kodin e etikës në faqen zyrtare dhe ambientet e bankës, si dhe 5 (pesë) banka të tjera janë në proces rishikimi për publikim.

8. Vendimin nr. 481, datë 16.11.2017 “Për dhënien e disa rekomandimeve Entit Rregullator të Energjisë në lidhje me kushtet e licencës së aktivitetit të shpërndarjes së gazit natyror”, me anë

të të cilit u vendos: T'i rekomandojë ERE qw nw draft-licencën e operatorit të shpërndarjes së Gazit Natyror të parashikohet raportimi i vazhdueshëm nga ana e të licencuarit dhe monitorimi i vazhdueshëm mbi realizimin e investimeve të planifikuara duke parashikuar sanksione në rast mosrealizimi.

- Në parashikimet e pikës 4.10 të draft-licencës, lidhur me kompanitë vertikalisht të integruara, të përfshihen në draft – licencë të gjithë parashikimet ligjore të nenit 51 të ligjit nr. 102/2015 “Për Sektorin e Gazit Natyror”, si edhe parashikimet e nenit 26 “Unbundling of distribution system operators” të direktivës 73/2009/EC, datë 13.07.2009 “Lidhur me rregullat e përbashkëta për tregun e brendshëm të gazit natyror”.
- Të përcaktohet në draft licencë detyrimi i Operatorit të Sistemit të Shpërndarjes së gazit natyror që të publikojë të gjithë të dhënat lidhur me tregun e shpërndarjes, të cilat ndihmojnë operatorët e tregut dhe përdoruesit e rrjetit, për të patur gjithë informacionin e nevojshëm për rrjetin e shpërndarjes në tregun e gazit natyror.
- Në pikën 4 të draft-licencës të parashikohet ndarja e pronësisë, në rast se operatori është ndërmarrje vertikalisht e integruar

9. KK me vendimin nr. 482, datë 16.11.2017 vendosi “Për dhënien e disa rekomandimeve Entit Rregullator të Energjisë në lidhje me kushtet e licencës së aktivitetit të furnizimit të gazit natyror” vendosi t'i rekomandojë ERE:

- Licencimi për veprimtarinë e furnizimit të gazit natyror, të kryhet pasi/ose paralelisht me miratimin e Modelit të Tregut të gazit Natyror, të parashikuar edhe në nenin 88 të ligjit “Për Sektorin e Gazit Natyror”, në mënyrë që të dalin qartë kushtet e operimit, roli dhe funksioni i operatorit apo operatorëve të furnizimit;
- Në pikën 3 (2) (a) të draft-licencës të përcaktohet afati i ndryshimit të furnizuesit “të drejtën e tyre për të zgjedhur dhe për të ndryshuar pa pagesë furnizuesin, jo më shumë se 3 javë nga fillimi i procedurës për ndryshim të furnizuesit” dhe sipas parashikimeve ligjore të nenit 3(6)(a) të Direktivës 73/2009/EC të datës 13.07.2009 “Lidhur me rregullat e përbashkëta për tregun e brendshëm të gazit natyror”;
- Në pikën 3.4 të draft-licencës të shtohet një paragraf ku të përcaktohet: “I licencuari i ngarkuar sipas ligjit me detyrimin për sigurimin e shërbimit të furnizimit me gaz natyror u siguron klientëve dhe ndërmarrjeve të gazit të dhëna mbi tregun e gazit natyror, konsumin e gazit natyror, duke i publikuar njëkohësisht këto të dhëna, të cilat janë të vlefshme për operatorët e tregut” sipas parashikimeve ligjore të nenit 3(12) të Direktivës 73/2009/EC të datës 13.07.2009 “Lidhur me rregullat e përbashkëta për tregun e brendshëm të gazit natyror”.
- Në pikën 4.1 të shtohet paragrafi: “faturat e shpenzimeve për çdo aktivitet të të licencuarit të jenë lehtësisht të dallueshme se cilit aktivitet i përket, pra faturat të kenë shenja dalluese të qarta sipas përkatësisë së aktivitetit të licencuara që janë përdorur, me qëllim që të

shmangen mbivendosjet e shpenzimeve apo regjistrimet e dyfishta, për aktivitetet e të licencuarit”.

10. KK me vendimin nr. 483, datë 16.11.2017 vendosi “Për dhënien e disa rekomandimeve Entit Rregullator të Energjisë në lidhje me kushtet e licencës së aktivitetit të tregtimit të gazit natyror” vendosi t’i rekomandojë ERE:

- Licencimi i aktivitetit të tregtimit të kryhet pasi/ose paralelisht me miratimin e Modelit të Tregut të Gazit Natyror, të parashikuar në nenin 88 të ligjit nr.102/2015 “Për Sektorin e Gazit Natyror”, mbi bazën e të cilit do të përcaktohen nivelet e tregtimit të Gazit Natyror;
- Në draft – licencë duhet të përcaktohet qartë roli dhe funksioni i tregut primar dhe tregut sekondar, tregut me shumicë dhe tregut me pakicë, sipas parashikimeve të nenit 4 (109) (110) dhe nenit 84(1)(2)(3)(4), të ligjit nr. 102/2015 “Për Sektorin e Gazit Natyror”, si dhe roli dhe funksioni i operatorit që do të kryejë aktivitetin e tregtimit në Modelin e Tregut të Gazit Natyror;
- Në draft-licencë duhet të përcaktohet afati i vlefshmërisë së licencës, të parashikuar në nenin 23 pika 1(a) e ligjit nr.102/2015 “Për Sektorin e Gazit Natyror”;
- Në pikën 3.6 të draft-licencës të parashikohet mbajtja e llogarive të ndara për gjithë aktivitetet e licencuara të operatorit”.

11. KK me vendimin nr. 492, datë 28.12.2017 vendosi “Për dhënien e disa rekomandimeve Entit Rregullator të Ujit dhe UKT në lidhje me ndryshimin e tarifave të shërbimit të furnizimit me ujë dhe largimin e përpunimit e ujërave të ndotura” ne lidhje me:

- Detyrimin për zbatimin e nenit 69 dhe 70 të Ligjit nr. 9121/2003 “Për mbrojtjen e konkurrencës” (i ndryshuar), duke kërkuar vlerësimin ligjor të Autoritetit të Konkurrencës për çdo projekt-akt normativ që potencialisht mund të sjellë kufizime të konkurrencës në tregun përkatës.
- Për çdo rast të rishikimit të tarifave të reja për ndërmarrjet e ujësjellës kanalizime, të përcaktohet qartë struktura e kostos mbi bazën e së cilës miratohen tarifat, bazuar në metodologjinë “Për vendosjen e tarifave për shërbimin e furnizimit me ujë dhe largim e përpunimit e ujërave të ndotura”, në të cilën përfshihen kostot e:
 - o Tarifës së ujit për shitje sipas kategorive të konsumatorëve;
 - o Tarifës për Shërbimin e Grumbullimit, Largimit e Përpunimit të Ujërave të Ndotura;
 - o Tarifës së shërbimit.
- Rritja e tarifave duhet të jetë graduale dhe në përputhje me kriteret e performancës, në mënyrë të veçantë të orarit të furnizimit me ujë.
- Të rishikohet kostot në drejtim të rritjes së performancës së administrimit dhe të rishpërndahen burimet e të ardhurave të kërkuara për investime edhe nga ulja e kostove të operimit dhe mirëmbajtjes pasi sipas vendimit të ardhurat do të vijnë në masën 96% nga rritja e tarifave, dhe vetëm 4% nga rritja e nivelit të faturimit.

- Publikimin dhe bërjen transparente brenda 30 ditëve nga dalja e këtij vendimi të të gjithë informacionit në lidhje me aplikimet për ndryshimin e tarifave, kostot përkatëse mbi të cilat bazohen këto ndryshime, si dhe për vitet 2018 dhe 2019 të publikohen treguesit e parashikuar për “ujin pa të ardhura”, “Kohëzgjatjen e furnizimit” dhe “Efiçencën e stafit”.

T’i rekomandojë UKT-së që:

- Aksionarët e UKT për ta bërë tregun sa më efiçent duhet të vlerësojnë mënyrat alternative të financimit të nevojave financiare të UKT nëpërmjet kredive të buta/të lehtësuara ose nëpërmjet obligacioneve të qeverisjes vendore sipas Ligjit nr. 10 158, datë 15.10.2009 “Për obligacionet e shoqërive aksionare dhe qeverisë vendore”.

Vlerësimi i akteve dhe projekt-akteve normative.

Gjatë vitit 2017, AK në përputhje me ligjin nr. 9121/2003, si me kërkesë të institucioneve propozuese, apo edhe me nismën e vet, *ka vlerësuar ex-ante 4(katër) projekt-ligje* si vijon:

- Projekt- ligji “Për sigurinë, ndëreveprimin hekurudhor, për organizimin dhe funksionimin e autoritetit të sigurisë hekurudhore” ;
- Projekt - ligji “Për administruesin e infrastrukturës hekurudhore”;
- Projekt - ligji “Për sipërmarrësin e Transportit Hekurudhor”;
- Projekt - ligji “Për Shërbimin Meteorologjik dhe Hidrologjik Shqiptar”;

3 (tre) projekt-akte normative në tregun e mediave audiovizive për AMA:

- Projekt -Kodi i Transmetimit për Median Audiovizive;
- Projekt-Rregullorja “Për komunikimet audio, ose/dhe audiovizive me natyrë tregtare. Format, kushtet dhe koha ditore e lejuar për transmetimin e reklamave”;
- Projekt-Rregullorja “Mbi përcaktimin e pagesave për licensë/autorizim dhe shërbimet që kryhen nga Autoriteti i Mediave Audiovizive”.

31 (tridhjetë e një) projekt-akteve normative në tregun e energjisë për ERE:

ERE gjatë vitit 2017, ka dërguar për opinion pranë AK-së projekt aktet nënligjore, në zbatim të ligjit nr.43/2015 “Për sektorin e energjisë elektrike”, ligjit 102/2015 “Për sektorin e Gazit Natyror” dhe ligjit nr.138/213 “Për burimet e rinovueshme”.

Në datë 23.10.2017, ERE ka dërguar për mendim kontratën e shërbimit të transmetimit të gazit natyror, ndërmjet shoqërisë Albgaz SHA dhe Albpetrol SHA. KK pasi shqyrtoi kontratën e nënshkruar ndërmjet shoqërisë Albgaz SHA dhe Albpetrol SHA, vlerësoi se: Kontrata e nënshkruar nga palët, nuk përmban ndonjë klauzole, e cila bie në kundërshtim me parashikimet e ligjit nr. 9121/28.07.2003 “Për mbrojtjen e konkurrencës”, i ndryshuar, por bazuar në nenin 69 të ligjit “Për mbrojtjen e konkurrencës”, ERE ka detyrimin ligjor që materialet apo aktet që kërkojnë vlerësimin e Autoritetit të Konkurrencës, të dërgohen përpara nënshkrimit nga palët. Marrëveshja

ka ardhur për opinion, pasi ka filluar dhe miratuar zbatimin e saj. Pra, marrëveshja ka filluar zbatimin që nga Janari 2017, ndërsa ka ardhur për opinion pranë AK në Tetor 2017.


Konferenca dhe tryeza të rrumbullakëta

1. AK në bashkëpunim me Organizatën e Kombeve të Bashkuara për Zhvillim (UNDP) zhvilloi në datat 11-12 dhjetor 2017 në Hotel Tirana International, në kuadër të ditës ndërkombëtare të konkurrencës, Konferencën Ndërkombëtare me temë: “13 vjet eksperiencë në politikën e konkurrencës në Shqipëri: aspekte të ligjit, ekonomisë dhe biznesit”, ku merrnin pjesë të ftuar nga Autoritetet homologe në Europë dhe SHBA, përfaqësues nga organizmat ndërkombëtare: BE, OECD, Konferenca e Kombeve të Bashkuara për Tregtinë dhe Zhvillimin (UNCTAD), Energy Community Sekretariat (ECS) etj, përfaqësues të institucioneve shtetërore dhe enteve rregullatore në Shqipëri.
2. Autoriteti i Konkurrencës, gjatë periudhës tetor–dhjetor 2017, organizoi 3 tryeza të rrumbullakëta, në qytetet e Elbasanit, Fierit dhe Durrësit, me temë “Kontributi i Autoritetit të Konkurrencës në zhvillimin e qëndrueshëm të bizneseve”, ku u paraqitën dy dokumente: (1) Programi i Lehtësimit nga gjrobat; (2) Programi i përputhshmërisë me rregullat e konkurrencës. Prezantimi i këtyre dokumentave synoi ndërgjegjësimin e komunitetit të biznesit në respektimin e rregullave të konkurrencës, si dhe me domosdoshmërinë e bashkëpunimit të tyre me Autoritetin e Konkurrencës.

Tregjet e Monitoruara

AK, në zbatim të nenit 28 të ligjit nr. 9121/2003 ka realizuar monitorime dhe analiza të tregjeve për zhvillimin e konkurrencës së lirë dhe efektive.

Nëpërmjet monitorimeve vlerësohen elementët konkurrues siç janë: strukturat e tregut dhe dinamikat e zhvillimit të tij, sjellja e ndërmarrjeve në treg në lidhje me konkurrentët e tjerë, konsumatorët, si dhe barrierat ligjore dhe ekonomike për hyrësit e rinj në treg.



Tregjet e monitoruara gjatë vitit 2017

Gjatë vitit 2017 u realizuan monitorimet si më poshtë vijon:

1. Tregu i shfaqjes së filmave në kinema në qytetin e Tiranës

Sekretariati i AK realizoi një monitorim në tregun shfaqjes së filmave në kinema në qytetin e Tiranës. Nga monitorimi u konstatua se tregu nuk paraqet barriera ligjore, por ka barriera të larta ekonomike që kanë të bëjnë me investimin fillestar për infrastrukturën e sallave dhe teknologjinë e transmetimit.

Tregu i shfaqjes së filmave në kinema rezulton një treg i përqendruar me karakteristikat e një tregu oligopolistik, ku operojnë tre ndërmarrje të cilat njëkohësisht shpërndajnë dhe shfaqin filmat në kinema. Nga monitorimi i realizuar u konstatua se ndërmarrjet që operojnë në treg përkatësisht: “Empire” SHPK (Empire), “Millenium” SHPK (Millenium) dhe “Cineplexx” SHPK (Cineplexx) kishin sjellje të njëjtë në lidhje me çmimin e shitjes së biletave, ditët e eventeve dhe në mënyrën e organizimit të ofertave. Për këto arsye, u gjykua se në tregun e shfaqjes së filmave në kinema, mund të kishte shenja të një sjelljeje të bashkërenduar të ndërmarrjeve në pjesën e shpërndarjes dhe sigurimit të të drejtave të transmetimit, kryesisht për filmat e huaj, sjellje e cila mund të përbënte shkelje të nenit 4 të ligjit nr. 9121/2003.

Për këto arsye, KK me vendimin nr. 466, datë 20.06.2017 “Për hapjen e procedurës së hetimit paraprak në tregun e distribucionit dhe shfaqjes së filmave në rrjetet e kinemave në Tiranë”, vendosi fillimin e procedurës së hetimit paraprak.

2. Tregu i importit, depozitimit, shitjes me shumicë, shpërndarjes dhe shitjes me pakicë të produktit gaz i lëngshëm për konsum familjar dhe biznes

Në datën 1 janar 2017, hynë në fuqi ndryshimet në ligjin nr. 61/2012, “Për akcizat në Republikën e Shqipërisë”, të ndryshuar, ku parashikohej vendosja e akcizës për kategorinë e gazit të lëngshëm natyror (GLN), vetëm për automjetet, në vlerën 8 lekë/litër pa T.V.Sh. Nisur nga sa më sipër u realizua monitorimi i tregut të shitjes së produktit gaz i lëngshëm për konsum familjar dhe biznes, ku u konstatua se ndërmarrjet “Kast & Gas”, “Gas Group”, “Koka Gas”, tregtonin me të njëjtin çmim. Kjo sjellje mund të përbënte një kufizim të konkurrencës në kuptim të nenit 4 dhe 9 të ligjit nr. 9121/2003.

Për sa më sipër, KK me vendimin nr. 446, datë 16.01.2017 vendosi “Për hapjen e procedurës së hetimit paraprak në të gjitha segmentet e tregut të importit, depozitimit, shitjes me shumicë, shpërndarjes dhe shitjes me pakicë të produktit gaz i lëngshëm për konsum familjar dhe biznes”.

3. Tregu me pakicë i shërbimeve celulare

Monitorimi në tregun me pakicë të shërbimeve celulare filloi me depozitimin e disa ankesave (Qendra “Konsumatori Shqiptar”, si dhe 3 ankimues individë) për planet tarifore që ofronin ndërmarrjet “Vodafone Albania”, “Telekom Albania”, “Albtelecom”. Nga montorimi u konstatua se tre ndërmarrjet kishin ndryshuar paketat standarte në periudhën 27 mars 2017 - 4 prill 2017 për klientët me parapagesë, e cila mund të përbënte një praktikë të bashkërenduar sipas nenit 4 të ligjit nr. 9121/2003.

Për këto arsye, KK, me vendimin nr. 461, datë 23.05.2017 vendosi “Për hapjen e procedurës së hetimit paraprak në tregun me pakicë të shërbimeve celulare”.

4. Tregu i transportit ndërkombëtar detar të udhëtarëve dhe automjeteve në portin e Vlorës

Pranë AK, shoqëria "A.Bus"SHPK, e cila kryen aktivitet në fushën e transportit ndërkombëtar të udhëtarëve me autobus, depozitoi Formularin Tip të Ankesës, kundrejt agjencisë "G Travel" SHPK, përfaqësuese e shoqërisë së tragetit "N.T.M Lda", që operon në linjën Vlorë - Brindisi dhe anasjelltas, për diferencim në çmimin e biletave të udhëtarëve.

Nga monitorimi i realizuar rezultoi se shoqërisë ankimuese “A.Bus”SHPK i ishte refuzuar shërbimi për të udhëtuar me tragetin e kompanisë N.T.M Lda duke vendosur kushte të padrejta tregtare lidhur me:

- Rritjen e çmimit të biletës për pasagjerë dhe automjete (autobusë);
- Detyrimin e saj për të udhëtuar vajtje – ardhje vetëm me tragetin e kësaj kompanie;
- Nënshkrimin e një kontrate me kushte dhe detyrime të padrejta tregtimi (draft kontrata kundrejt një garancie financiare).

Për sa më sipër, KK, me vendimin nr. 455, datë 28.03.2017 "Për hapjen e procedurës së hetimit paraprak në tregun e transportit ndërkombëtar detar të udhëtarëve dhe automjeteve në portin e Vlorës" vendosi fillimin e procedurave hetimore.

5. Tregu i importit, përpunimit dhe ambalazhimit të kafesë

Gjatë vitit 2017 u realizua monitorimi i tregut të importit, përpunimit dhe ambalazhimit të kafesë dhe analizimi i kushteve të tregut për zhvillimin e konkurrencës së lirë dhe efektive.

Nga monitorimi rezultoi se:

- Tregu i importit të kafesë është një treg me një numër të madh konkurrentësh të cilët zotërojnë pjesë relativisht të vogla, për këtë arsye vlerësojmë se tregu i importit të kafesë së të gjitha llojeve është një treg jo i përqendruar;
- Nga analiza e të dhënave rezultoi se kafeja e pjekur që importohet në Shqipëri zë rreth 26% të sasisë totale të importuar, ndërsa kafeja kokërr e papjekur zë pjesën më të madhe të tregut me rreth 74%, e cila përpunohet dhe ambalazhohet në vend;
- Referuar pjesëve të tregut të ndërmarrjeve sipas sasisë së importuar rezultoi se asnjëra nga ndërmarrjet që ushtron veprimtari në tregun e importit të kafes nuk zotëron pozitë dominuese në treg në kuptim të nenit 8 të ligjit nr. 9121/2003;
- Nga monitorimi rezultoi se çmimet e shitjes të aplikuara nga ndërmarrjet janë të ndryshme dhe me diferenca domethënëse, sjellje e cila nuk përbën shenja të kufizimit të konkurrencës në kuptim të nenit 4 të ligjit nr. 9121/2003.

Në përfundim u konkludua se në tregun e importit, përpunimit dhe ambalazhimit të kafesë nuk ka shenja të kufizimit, shtrembërimit apo pengimit të konkurrencës sipas nenit 4 dhe 9 të ligjit nr. 9121/2003.

6. Tregu i importit dhe shitjes së cigareve

Nga monitorimi në tregun e importit dhe shitjes së cigareve të paketuara, për të evidentuar nëse ka pasur ndonjë rritje të pajustificuar të çmimeve të tregtimit me pakicë për cigaret e paketuara, u arrit në përfundimin se:

- Në tregun e cigareve në Shqipëri ka disa lloje markash të cigareve të paketuara (paketa), të cilat tregtohen nga importues dhe distributorë të ndryshëm.
- Cigaret janë mall akcize që paguhet në bazë të shkallës tatimore në fuqi në çastin kur tatimi bëhet i detyrueshëm për t'u paguar.
- Tregu i importit të duhanit ka strukturë oligopolistike duke qenë se në treg operojnë 7 ndërmarrje. Bazuar në pjesët e tregut të importeve të këtyre ndërmarrjeve, fuqisë kundërvepruese të blerësve, vlerësojmë se asnjë nga ndërmarrjet që ushtrojnë veprimtari në tregun përkatës, nuk përmbushin kriteret e nenit 8 të ligjit nr. 9121/2003 dhe nuk kanë pozitë dominuese në tregun përkatës.
- Nga monitorimi i tregut pranë pikave të shitjes, nuk u vërejtën shenja të rritjes së çmimit të shitjes me pakicë për cigaret e paketuara.

Për sa më sipër, për të vlerësuar sjelljen e ndërmarrjeve në tregun e importit, shitjes me shumicë dhe shitjes me pakicë të cigareve të paketuara, si dhe për të vlerësuar efektet e ndryshimeve të akcizës së cigareve, gjatë vitit 2018 ky treg do të mbahet në monitorim

Ankesat

Pranë AK, për periudhën Janar- Dhjetor 2017 janë paraqitur 36 ankesa, prej të cilave ka rezultuar që 13 prej tyre, (rreth 35%-1/3) që në adresimin e ankesës kanë qenë jashtë fushës së zbatimit të ligjit nr.9121/2003. Institucioni ka shqyrtuar pa vonesë çdo ankesë sipas qëllimit të Ligjit dhe ka bashkëpunuar me institucionet e tjera për t'i dhënë zgjidhje ankesave të depozituara dhe problematikës së tregjeve. Numrin më të madh të ankesave e zënë ato që lidhen me tregun e komunikimeve elektronike.

Risi për këtë periudhë kohore përbën fakti që janë paraqitur ankesa që lidhen me sektorë të ndryshëm të ekonomisë të tilla si Ruajtja dhe sigurimi fizik (rojet), ankesa ndaj institucioneve shtetërore për mosbarazi në tendera për zonën Ekonomike në Spitallë të Durrësit, prodhimeve plastike, bimës medicinale sherebelë, tregun ngarkim shkarkimit në porte (stivadorimit), mosrespektimit të kontratave të ekskluzivitetit, tregun e shërbimeve funerale dhe të mbetjeve spitalore në Berat, tregun e plehrave kimike Lushnje, çmimet në tregun e biletave të transportit me avionë, tregun e kullotave komunale blegtorale Prrernjas,

tregun e udhëtimit me autobus nëpërmjet Portit të Vlorës për Itali, mbi shkeljen e së drejtës ekskluzive të Postës sh.a., reklama mashtruese AMA vs.UET., praktika jo-korrekte Event Market vs.Horeal Expo Group, etj. AK ka proceduar rast pas rasti duke filluar monitorimin e tregjeve, për të dhënë vendimet përkatëse për hapjen e tregut për konkurrencë, ose në rastet kur ankesat kanë qenë objekt hetimi në kuadrin e ligjit të konkurrencës ka ndërhyrë për t'i vendosur operatorët në kushtet e “barazisë në treg”.

Sektori i telefonisë celulare, gjithashtu ka shfaqur problematika gjatë funksionimit të tij dhe për këtë arsye në Autoritet janë adresuar ankesa kryesisht për shkelje të rregullave të barazisë. AK ka ndërhyrë në rastet e dyshuara për kufizim të konkurrencës në tregun e telefonisë celulare duke dhënë rekomandime për institucionet rregullatorë me qëllim rikthimin e konkurrencës dhe barazisë në treg.

RISTRUKTURIMI I ORGANIZIMIT TË AUTORITETIT

6.1 Ristrukturimi i AK

AK në funksion të përmbushjes së misionit të tij dhe për t'ju përshtatur zhvillimit ekonomik të vendit, si në fushën e prodhimit, ashtu edhe atë të shërbimit, si dhe për të shkuar në koherencë edhe me modelet e vendeve anëtare të BE-së dhe ato të rajonit, për të realizuar një ekspertizë cilësisht më të mirë në funksion të monitorimit dhe hetimit të tregjeve në raport edhe me detyrimet që burojnë nga procesi i integritetit në BE, i propozoi Kuvendit të Republikës së Shqipërisë, strukturën e re, e cila me vendimin nr.43/2017 u miratua nga ana e tij.


Nëpërmjet kësaj strukture, AK:

- Realizon analiza, studime, hetime dhe autorizime të përqendrimeve që njoftohen pranë Autoritetit. Në strukturën e re, u miratua një pozicion i ri kyç – Kryekonomisti, i cili kryen analiza të veçanta ekonomike dhe ekonometrike, për të lejuar një zgjidhje më të plotë dhe adekuate për çështje të konkurrencës në treg.
- Autoriteti i Konkurrencës, duke qënë lider në Kapitullin 8-të në procesin e integritetit në BE dhe duke qënë pjesë e drejtëpërdrejtë e negociatave për anëtarësim, krijoi një drejtori të re, atë të Integritetit European dhe Komunikimit.

Struktura e miratuar tashmë ka në përbërjen e saj 5 drejtori teknike dhe një drejtori mbështetëse dhe është në përputhje me: Ligjin nr.152/2013 “Për nëpunësin civil”, Ligjin nr. 9584, datë 17.07.2006 “Për pagat, shpërblimet dhe strukturat e institucioneve të pavarura kushtetuese dhe të institucioneve të tjera të pavarura, të krijuara me ligj” që drejtohen nga Sekretari i përgjithshëm, i cili përgjigjet për mbarëvajtjen e veprimtarisë së Sekretariatit, zbatimin e procedurave të Ligjit nr. 9121/2003 për shqyrtimin e rasteve,

hartimin dhe paraqitjen e raportit përmblendhës të hetimit pranë Komisionit për vendimmarrje, si dhe menaxhimin financiar të Institucionit.

Ky ristrukturim e ka sjellë këtë Institucion më afër me natyrën dhe dinamikën që paraqet tregu sot në Shqipëri, duke imponuar edhe një rregullim të dukshëm në përputhje me kërkesat dhe nevojat e konsumatorit në funksion të rritjes së mirëqënies së tij.




6.2 Realizimi i buxhetit për vitin 2017

Gjatë vitit 2017 përdorimi i Buxhetit, ka qenë konform kërkesave të ligjit “Për Menaxhimin Financiar dhe Kontrollin” dhe është përdorur me efikasitet për plotësimin e kushteve dhe kërkesave të punonjësve për realizimin e detyrave të ngarkuara.

Buxheti është realizuar në masën 98.4 % i ndarë në zërat sipas aneksit bashkëlidhur këtij raporti.

Në grafikun e mëposhtëm pasqyrohet në % çdo kategori shpenzimesh, përkundërt totalit të realizuar të buxhetit:



6.3 Të ardhurat e realizuara

Gjatë këtij viti në buxhetin e shtetit janë derdhur si të ardhura nga përqëndimet (njoftim dhe autorizim përqëndrimi) shuma 8.020.000 lekë.

Tabela e Shpenzimeve të AK për vitin 2017

Kodi	Emërtimi	Plani (me ndryshime)	Fakti	/
		Lekë		
600	Paga , shperblime etj	45,641,000	45,383,786	99%
601	Kontribute për Sig.Shoqërore	7,000,000	6,894,741	98%
602	Materiale dhe Shërbime	12,060,000	11,318,836	94%
231	Investime	1,000,000	988,200	99%
Totali		66,752,000	65,616,565	98.40%

Të ardhurat të realizuara nga përqendrimet të derdhura në buxhet për vitin 2017

Kodi	Emërtimi	Fakti
		Lekë
711	Të ardhura të derdhura në Buxhet	8,020,000

6.4 Rekrutimet

Gjatë 2017, në kuadër dhe të ristrukturimit janë realizuar 7 procedura rekrutimi me ngritje në detyrë dhe pranim në shërbimin civil. Të gjitha procedurat janë realizuar konform kërkesave të ligjit nr.152/2013 “Për nëpunësin civil” i ndryshuar.



Gjatë vitit 2017, janë realizuar 24 trajnime jashtë vendit dhe 4 brenda vendit, ku është trajnuar një numër i konsiderueshem prej 44 punonjësish të institucionit, ku një pjesë e punonjësve rezultojnë të jenë trajnuar më shumë se njëherë. Të gjitha trajnimet janë realizuar në kuadër të bashkëpunimit ndërkombëtar të AK me ICN, RCC OECD, dhe brenda vendit nga Shkolla e Administratës Publike, kryesisht lidhur me HRMIS-in dhe për hedhjen e pagesave në sistemin e përgjithshëm financiar.

